

Inuussutissanik allagartalersuisarneq pillugu Namminersornerullutik Oqartussat nalunaarutaanni nr. 1-imi, 2. februar 1994-imeersumi § 11 imm. 2 nummer 1-ip allanngorteqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut, nalunaaqutsersuisarneq aamma tuluttut pisinnaanngortillugu.

Inatsisartunut ilaasortaq Steen Lynge, Demokraatit

Akissuteqaat

(Inuussutissarsiornermut Nukissiuuteqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortaq Steen Lynge qutsavigissavara siunnersuutaa pillugu.

Inuussutissanik allagartalersuisarneq pillugu Namminersornerullutik Oqartussat nalunaarutaat 1994-imeersuuvoq, piffissaalerlunilu nutarterneqarnissaanut. Taamaattumik Naalakkersuisut nalunaarutip nutarterneqarnissaa aallartinniarpaat, nunatsinni pissutsinut ineriartorfiusunut malinnaatikkumallugu.

Naalakkersuisut siunnersuuteqartutulli kissaatigaat nioqqutissat atorfissaqartinneqartut, tamatumani aamma inuussutissat sapinngisamik nunatsinni akikitsuunissaat. Taamaattumillu aamma Naalakkersuisut isiginiarniarpaat periarfissat assigiinngitsut, nioqqutissat akiinik appaasinnaanermut tunngatillugu, atuisartunit nioqqutissat atorneqarnerusut eqqarsaatigalugit.

Inuussutissanik allagartalersuisarnerit arlalinnik siunertaqartarput, pingaarnerlu soorunami tassaalluni nioqqutigisaq pillugu paasissutissat. Tamakkulu saniatigut innuttaasunut isumannaallisaanermi peqqinnissamullu tunngasutigut sianigisassa qarpoq. Taamaalillunilu pingaaruteqarpoq assersuutigalugu innuttaasut sapigallit imaluunniit laktose-mik iluarisaqanngitsut inuussutissanik pinngitsuuisinnaanissaat akuutissanik sapikkaminnik imalinnik.

Naalakkersuisut piareersimaffigaat periarfissat isiginiarnissaat, siuliani eqqaaneqartut isiginiagassat naammassineqarnissaannut tunngatillugu, immikkut piumasqaateqanngikkaluarluni poortuutaasup / nioqqutissap kalaallisut imaluunniit skandinaviamiusut allagartaqarnissaanik.

Taamaattumik Naalakkersuisut siunnersuut tapersorsorpaat, naatsorsuutigalugulu nalunaarummik nutaamik 2019-ip ingerlanerani atortuulersitsinissaq, maanna nutaamik nutarterineq aallarereermat. Tuluit oqaasiinik atugaqarnerni siunertarineqanngitsunik kinguneqannginnissaa qularnaarniarlugu matuminnga allannguutitaqartillugu siunnersuutip akuersissutiginnissaanut Naalakkersuisut inassuteqarput:

”Inatsisartut aalajangiiffigisassaattut siunnersuut Inuussutissanik allagartalersuisarneq pillugu Namminersornerullutik Oqartussat nalunaarutaannik nr. 1, ulloq 2. februar 1994-imeersumik nutarterinerminnut atatillugu Naalakkersuisut misissussagaat inuussutissanik allagartalersuisarnermi inuussutissat aamma tuluttut allagartalerneqartalersinnaanersut.”

Taamatut oqaaseqalunga Inatsisartuni oqallilluartoqarnissaa neriutigaara.